



## 時計果

兩年前个寒天，一頭時計果恬恬仔在屋脣个菜園生出來。本來毋知佢个名仔，舖娘看厥葉仔，講係百香果，佢看乜有兜仔像，就同佢留等，無摻佢準野草擲忒！過後，無去注意佢，乜無特別去掖肥淋水照顧佢，就等佢自家生。第二年个春天，百香果个藤葉，就跔等瓜棚个網仔，遞一路上棚。還愁，毋知愛仰般正好！瓜棚本旦就係留分逐年種个苦瓜遞个，這下，多一頭時計果愛遞，係無摻時計果伐忒，毋知棚面罅闊好分佢兜遞無？

無想著經過春天、熱天，等到苦瓜打過、燥死，苦瓜同時計果，一直在棚面和平相處！百香果無遮過來，苦瓜乜無探過去，兩頭平分瓜棚，各開各个花、各打各个果，苦瓜、時計果都有當好个收成。正經係佢好愁毋愁，愁該棚面毋罅闊、愁該苦瓜無位仔好遞！

客人講時計果，就係百香果，就係絢契嫂(toˊ kie soˊ)，這三種名仔，佢都有聽過！安到時計果，係因為時計果開花个時節，厥个花看起來就像圓圓个時鐘仔，面項有像時針、分針个針仔，乜有代表時間个刻度，正經像到無跌忒！安到百香果，係因為果子裡肚个果肉，不管係鼻起來抑係食起來，像有多樣果子个香氣，還有豐富个營養。安到絢契嫂，可能係借自日本話「Tokei」表示時鐘个意思，挨音挨音仔傳啊下來个！不管仰般个名仔，時計果酸酸甜甜个味緒，食過个人都當記得。

舊年秋天，野生个時計果打到滿棚就係。等到果子熟地，青青个果子就會轉色，轉到紅色，無就變到較烏个烏黧紅，等到蒂頭敲忒，時計果就會跌到瓜棚下。佢識拈起擘來現食，無想著該味緒，會讓人目珠緊眨，緊講恁酸！野生个正經無恁甜哦！佢惱起頭過，去山項拈野生个百香果來食，該酸丟丢个味道，實在共樣共樣！毋過，酸罔酸，該百香果个香氣，還係當錫人。

今年百香果共樣遞到滿棚、打到當結，就無地方好分苦瓜遞哩！分苦瓜遞地多年个苦瓜棚，今年就正式讓分百香果！等到時計果跌落地泥熟地，挖出該酸甜酸甜个果肉，放入杯仔肚，再放入蜂糖攪入適量个冷滾水，該酸甜好食个味緒，想著口涎水就會流出來。

作者：邱一帆

### ☆詞彙學習☆

【時計果】siiˊ gie goˊ：百香果。

【掖肥】ie piˊ：施肥。

【伐忒】padˊ tedˊ：砍掉。

【罅闊】la fadˊ：夠寬。

【轉色】zonˊ sedˊ：變色。

【烏黧紅】vuˊ du fungˊ：暗紅色。

【現食】hien siid：馬上吃。

【當結】dongˊ giedˊ：結實纍纍。